



*Ioseph fait posseder la terre de Gessen à son pere ; puis fait donner la benediction à ses enfans.*

**I**ACOB ayant esté bien receu du Roy Pharaon , eut vne grande ioye en son cœur de ce que Dieu auoit pourueu à la nourriture de sa posterité , & ce par le moyen de Ioseph , qui le mena avec toutes ses familles & bestial , en la meilleure terre d'Egypte , nommée Gessen , qui estoit tant fertile , qu'elle abondoit en ce que la vie humaine peut desirer ; en laquelle Iacob y passa dix-sept ans , comprenant les cinq années qui restoient de sterilité. Enfin sentant nature defaillir en luy , il fit appeller Ioseph , & iurer sur sa cuisse , qu'il feroit porter ses os en Chanaan , pour y estre mis en sepulture avec ses ancestres. Ce que Ioseph luy promit & iura : & comme il iuroit , Israël s'enclina , & adora Dieu ; & quelques iours apres Ioseph entendit que son pere declinoit fort par sa grande vieillesse , parquoy il le vouloit visiter , tant pour le consoler , que pour faire donner benediction à ses deux fils. Ce que fit Iacob croisant ses bras , & mit sa main droite sur Ephraim , & la senestre sur Manassé ; ce que Ioseph voulut empescher , mais Iacob dit à Ioseph , le sçay bien ce que ie fais.